

Հայաստանի և Ռուսաստանի գիտությունների ակադեմիաները ստորագրեցին համագործակցության նոր համաձայնագիր



Հայաստանի Հանրապետության գիտությունների ազգային ակադեմիայի նախագահ, ակադեմիկոս Ռադիկ Մարտիրոսյանը և Ռուսաստանի Դաշնության գիտությունների ակադեմիայի նախագահ, ակադեմիկոս Ալեքսանդր Սերգեևը մայիսի 29-ին Մոսկվայում ստորագրեցին

համագործակցության զարգացման նոր համաձայնագիր: Համաձայնագիրը միտված է նպաստելու երկու երկրների գիտական հետազոտությունների հետագա զարգացմանը, ակադեմիական համայնքների ավանդական փոխշահավետ հարաբերությունների ամրապնդմանը:

Կողմերը գիտական և տեխնիկական համագործակցություն կիրականացնեն գիտության հետևյալ ճյուղերում.

- մաթեմատիկական և տեխնիկական գիտություններ,
- ֆիզիկա և աստղաֆիզիկա,
- բնական գիտություններ,
- քիմիական և կենսաբանական գիտություններ,
- հումանիտար գիտություններ:

«Մենք բարձր ենք գնահատում Ռուսաստանի գիտությունների ակադեմիայի դերը Հայաստանում գիտության զարգացման գործում: Մեր գրեթե բոլոր ինստիտուտները համագործակցում են Ռուսաստանի ակադեմիական ինստիտուտների հետ: Բացի այդ, Ռուսաստանի գիտությունների ակադեմիայի հետ մենք համագործակցում ենք Միջպետական տնտեսական հանձնաժողովի շրջանակներում», - հայտարարեց ՀՀ ԳԱԱ նախագահ, ակադեմիկոս Ռադիկ Մարտիրոսյանը:

Ռուսաստանի գիտությունների ակադեմիայի նախագահ Ալեքսանդր Սերգեևը նշեց, որ շատ բարձր են գնահատում

Հայաստանի գիտությունը, որ Հայաստանը Ռուսաստանի ռազմավարական գործընկերն է բոլոր ուղղություններով, այդ թվում՝ գիտության:

Հանդիպման ժամանակ Ռադիկ Մարտիրոսյանը բարձրացրեց կադրերի պատրաստման հարցը և առաջարկեց ՌԴ ԳԱ ապագա խոշոր գիտահետազոտական ծրագրերում ընդգրկել նաև հայ հետազոտողների: ՌԴ ԳԱ նախագահը խոստացավ աջակցել բարձրացված հարցերի կարգավորման գործում:

Մոսկվայում Ռադիկ Մարտիրոսյանը այցելեց ՌԴ ԳԱ ընդհանուր ֆիզիկայի և տիեզերական հետազոտությունների ինստիտուտներ, որոնք Հայաստանում համագործակցում են ՀՀ ԳԱԱ ֆիզիկական հետազոտությունների ինստիտուտի և ՀՀ ԳԱԱ Բյուրականի աստղադիտարանի հետ: Ինստիտուտների տնօրինությունների հետ քննարկվեցին համագործակցության հարցեր:

ՀՀ ԳԱԱ տեղեկատվական-վերլուծական ծառայություն